

# OLA

PULETINI A'OGA

20 AUKUSO 2018 ~ Lomiga 24 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication



LUMANA'I O MALIE: O le lumana'i fo'i o Samoa. Teine ma tama a Malie Primary i le Tuamasaga. O se tasi a'oga sa auai le fanau i le sailiga a le UC i leo Samoa. Malie o se tasi tulagalua e afua mai ai nisi suafa ta'uta'ua i le tele o faiva; lotu, taaloga, a'oga, upufai o malo, ma isi.

## otootoga

### Se isi solo tete

Ua faafua se isi solo tete i le vaiaso fou. E tusa ma se 500 le aofa'i o i latou e galulue i a'oga i faiva e iai le fautua, le tomai i aga a le mafaufau ma le vao tomai faapitoa. E manatu foi latou ua mamafa le tiute ae le tutusa ma le tau i ala i totonu.

### Faama'i oloa a fanau

O loo ua feagai fanau a'oga ma se faama'i o nifo tuga. Faaalia e se foma'i faapitoa le tele o le afaina ma lona taugata pe a tuai ona foia. Ua faailoa le mafuaaga, o mea'ai suka ma vai inu suamalie. O le tele o na oloa e maua gofie toe taugofie foi.

### Logoina faia'oga gagana

O le vaiaso talu ai na fesoota'i ai le tupaau (VC) a le iunivesite a Aukilani ma faia'oga o gagana, e faailoa lana fuafuaga; e iai nisi o le a faamalolo mai galuega. O lenei fuafuaga a le pulega e fesoota'i i lana faamamafa ua ave nei i le tekonoosi.

### "mafauaaga o le vaiaso"

E le o le gagana a sola, a o le agaga ua taua e atua ese.

Pole ma Papa

## Mae'a se su'esu'ega i le leo Samoa

O le sootaga o le leo ma le faailoga mata'itusi o se tasi vaega taua i le a'oina o se gagana. E faavae ai le mau i le taua o le iloa e fanau o sea sootaga ina ia poto e faitau.

E 'auga i ai se tasi su'esu'ega sa faia i totonu o ni a'oga se fa a Samoa, e ono vaiaso sa faagaoioi ai. O le susuga i le faia'oga ia Saili Aukuso, sa nafataulima, mo le UC Iunivesite a Kenetaperi.

O se su'ega na saunia lava i lalo o se poroketi a le UC, i le gagana Samoa, ma maua ai le avanoa e faata'ita'i ai i totonu o nei a'oga a le atunuu. O le sini e fia iloa le tulaga o le malamalama o fanau i lea sootaga a le leo ma le faailoga. O lea ua mae'a le su'ega a o le a auiliili nei e fia maua se tali mai mo nei a'oga e fa. Atonu foi e atagia i le su'ega le tulaga o se vaaiga aoao i a'oga a Samoa i lea tomai.

O le tomai i le vaai i le faailoga ma faaleo ua leva le masani mai ai o a'oga Samoa, peita'i ua lafoa'i e nisi atunuu ae suia i nisi auala. O le aoga lea o le su'ega, saunoa mai le faia'oga su'esu'e, e fia faamautinoa poo



Saili Aukuso o le UC sa faia le su'esu'ega, ma se vaega o lona aiga i Leauvaa

tumau pea lea mo Samoa i nei tupulaga.

O le su'esu'ega a Aukuso o se vaega lava o se poroketi a'oga o loo galue ai i le UC, faavae ai foi sana su'esu'ega to'atasi mo le tikeri o le foma'i tofamanino i mea taua'oga.

O a'oga sa filifilia mo le su'ega o le Samoa Primary, 25 tamaiti; Vaiusu 25 tamaiti; Afega 25 tamaiti; ma Malie e 25 tamaiti.

O se avanoa foi e molimau ai i le tiute faafaia'oga i Samoa i lenei taimi. O le a avea ma se vaega o sana faamatalaga i le su'esu'ega o loo feagai ai.

Sa faaalia le alofa tula'i o laumua a'oga ta'itasi i le asiasiga, susuga i pule ma e lagolago, o matua ma fanau, auā le tu ma le aga ua masani ai Samoa.

Ripoti o le Vaiaso:

## Lagolagoina le finau a faia'oga e Niu Sila lautele

E leai se isi o le mamalu lautele na siligia e le afaasalalau e le tali ioe i le finau a faia'oga mō latou totogi.

E ta'u mai ai le lagolagoina o faia'oga i la latou finau. E oo lava i nisi o faipule a le malo, e talitonu o se vaega e ao ona faaleleia.

O le tasi lea malosi na tootoo ai le savali tete'e a sui o le iuni i le vaiaso ua te'a.

Lenei ua toe foi atu i potua'oga e talia ai le feutaga'iga o loo faia pea i le va o le malo ma le iuni.

Afai e le masuiga i se lelei o lea ua faafua le isi ta, e lua aso atoatoa e tuua ai le galuega.

E lima vaega o le talosaga a le iuni, 1. O se siitaga e 16 pasene i le lua tausaga. E sii ai le totogi amata mai le \$49,588 i le \$57,522. A o faia'oga ua atoa le 7 tausaga o le potomasani, e fia sii mai le \$75,949 i le \$88,100. O le tau atoa e faatino ai, \$296 miliona i le tausaga.

2. Ave ese pa o tua'oi o loo tuu i le va o e leai ni tikeri ma taualuga o loo avanoa i ai i latou e umia ni tikeri.

3. Ia sii totogi o pule e le atoa se 100 tamaiti o lana a'oga e faatutusa ma latou e ta'i 100-150 tamaiti. E \$7 miliona e faatino ai.

4. Ia amana'ia le galuega a faia'oga o loo a'oa'oina le gagana Maori ma gagana a le Pasefika.

5. Ia amana'ia le tautua a e ua iai tomai faapitoa mo mana'oga faapitoa.

E tolu vaega e lei manino mai ni tau, ae afai e tuu faatasi ma isi mana'o e iai le faalaiti o vasega, le

faaoloaina i alagaoa moomia, o lona uiga e faaluaina pe sili atu le aofa'i e faatino ai le talosaga.

I le tali mai a le malo e iai nei:

1. Sii totogi o faia'oga amata faitikeri i le \$7050 (14.2

pasene) i totonu o le tolu tausaga e maua ai le \$56,638. O i latou ua atoa le 7 tausaga o galulue e faaopoopo le \$4650 (6.1 pasene) i totonu o le tolu tausaga, e maua ai le \$80,599 pe a aulia le 2020. O le tau e faatino ai, \$150 miliona i le tausaga.

2. Faatutusa totogi o faia'oga amata, umia pe le umia se tikeri.

3. Sii totogi o pule i le isi tolu tausaga mai le 9.5 i le 11 pasene mo a'oga e i lalo ifo o le 150 tamaiti; mai le 6.6 i le 7.6 pasene mo a'oga e i le va o le 150-675; mai le 6 i le 6.3 pasene mo a'oga i luga a'e.

4. Fa'aaau le galuega i le tapenaga o le faavaagalua faigaluega.

Ona faaopoopo lea i ai i le talosaga o totogi isi vaega taua e fesoota'i tonu i le faatinoga o le faiva. E iai le fe'oma'i o vasega ona o le numera, taimi malolo o faia'oga, faatupega o le augalulue fesoasoani ma alaga'oa e lagolago ai mana'oga faapitoa o fanau, ma isi.



Se tasi vaaiga i le Aso Lulu o le tete'e a faia'oga, taulaga o Aukilani. Ata Dorday/Stuff

I le Aso Lulu i Ueligitone, na faatali mai le palemia ma faipule o le maota i le taunuu atu o le solo. Ae taumate o se faailoga lea o le taliaina o le talosaga. E atagia i lafoga a le minisita e le lavatia i le faasoa a le malo le mana'o o faia'oga i lenei taimi. Saunoa foi Winston Peters e le maua se tali atoatoa i le na o se tasi se tala faatatau o le tupe.

O le tele o faia'oga na siligia sa ta'ua le taugata o le tau o le soifuaga ua avea ma to'atuga muamua. I nofoaga e pei o Aukilani, e le tutusa ma isi vaega o le atunuu, i totogi o fale. penisini ma taumafa; ae le ta'ua faafitauli o le faiva, le feoma'i o potu a'oga, ma le vao tiute e fetoa'i ai ma tiute faamatua i se aiga.

Fesiligia se tasi tina faia'oga matua i le pogai o lona auai i le tete'e, o lana tali, "e le o le tupe, a o le amana'ia, ne'i faapea le atunuu matou te tete'e ona o tupe."

E 1479 le aofa'i o a'oga na tapuni lotoa ona o le tete'e a le Iuni.

## E o faatasi le tulaga ta'uaogaina ma ausiga a fanau

O se tilotilo faatafailagi i le tulaga o le tofi faia'oga ma lona tulaga i le faatulagaga o tiute, e iai mea nei:

Muamua, e o faatasi le tulaga o le tofi ma fua o ausiga. Soo se malo e ave le faamua i le tofi faia'oga o na foi o loo selesese i ausiga mata'ina a fanau. E iai Finelani. ma Suetena. I Finelani mo se faata'ita'iga, e faale iloga totogi o faia'oga, ae le lagona atu se faameo. E mafua lea ona o le tulaga amana'ia o le tofi faia'oga.

O le finau, e le fuaina i tupe le lagona ta'uaogaina.

Atoa foi lenei. E totogi e lau lafoga au inisiua, e iai lou ola maloloina ma le aiga, e le tau teuina ni tupe mo a'oga a le fanau auā e totogi uma e le malo na tau. E a'oga fua foi fanau i



Vaivai i tiute o le galuega e le ma'alofia e nisi

iunivesite a le atunuu. E le so'ona taugata totogi o fale ma le tau o le soifuaga. O mea uma na e fua i ai le tilotilo i le tulaga o le faia'oga i lea malo. E faapena foi Suetena.

O molimau ia i le itiiti o le sootaga a le tupe (totogi) ma le naunauga i faia'oga e si'i maualuga ausiga.

Ae molimau foi le sootaga o le tupe ma ausiga a se malo i lona itu taule tamaoiga. E molimau malo na e iai

Lusemepeka, Aealani, Korea ma Siamani. O i latou uma na o loo lalamua i tala o tamaoiga manuia.

Lusemepeka o se malo laitiiti na o se 590,000 tagata, ae ta'uta'ua i le totogi lelei o ana faia'oga. E \$79,920 tālā Amerika le totogi amata. A o e ua tele le potomasani e \$138,920 (tālā Amerika) i le tausaga. A liliu lena i le tupe Niu Sila o se totogi tele.

E mafai foi ona faapea o malo e leaga totogi o a latou faia'oga e aliali foi i ausiga a fanau a'oga. E fai si umi o lenei lisi, ae ta'imua ai le tele o malo Aferika ma Asia.

Peita'i o le fesili i le lelei ma le leaga e le fuaina i se fua e tasi. E pei o Finelani, e ui e le maualuluga totogi, ae tele isi mea e faapaleni ai le fua tutusa.

Aemaise lava o lona ta'umauaogaina o le faiva.

*Faasoa o le Vaiaso: Levi Tavita*

## O le sootaga a tafigāgagana ma atua a le lalolagi

A o tatou talanoa ma fetufa'i i la tatou gagana a o le upu moni o loo mou malie atu lona malosi i itula ta'itasi o le taimi. E faapei o se fanua e aia i le sami, e fai malie, ae alu a'i ua iloga mai sona afaina.

O le iuga foi lea mo se 'afa o gagana pe a ma se 7000 a le lalolagi, o loo ua faitauina i le tulaga lamatia. Fai mai se tasi faatatau e ta'ifa masina ma leiloa se gagana, ae manatu isi e sili atu le saosaoa i lo lena; amata i gagana aupito lamatia. Fai mai le UNESCO e le itiiti ifo i le 2500 e lavea i le lisi lea.

E pei o na i le vao tele o le Amasone i Amerika i Saute. E iai se tasi nuu tuvao na maua lata mai e tagata su'esu'e, toe to'atasi le tamaloa o loo nofo ai. O loo saili le mafua'aga, pe o se faama'i poo ni sauaga ua galoma ai tagata. A ua iloa lava le mea moni, toe pau lea o le sootaga o lenei ituaiga ma le lalolagi—o se tagata e to'atasi. Se'i iloga o se vavega ona mafai lea ona fa'aauau le tala a nei tagata.

O lamatiaga i gagana e aofia ai faama'i fou e avatu e isi i totonu o se nuu, auā a tafia tagata ua tafia foi gagana ma aganuu. O isi tafiganuu e faatino i sauaga ma le pule faumalo. E pei ona molimau le tala faasolo.

Ae sili ona malosi le pule faumalo a se gagana. I nei aso o le pule aoao a malosiaga faapisinisi e lagolagoina se gagana se tasi. Auā o lea e faigofie ai ona fefaataua'i oloa ma faasafua atu la latou pule i loto ma mafaufau o tagata. Talu ai o le auala e maua ai tupe, ma gaosi ai tamaoiga faaonaponei, atoa ma nisi faamanuiaga, o le pogai lea o lona lagolagoina e malo ma tagata. O lena lagolago e moomia ai se gagana. I o tatou tupulaga o le gagana a tagata Egelani, pito le Farani ma isi.

E tele isi ituaiga i tulimanu e fia o le lalolagi ua iai i le tulaga lea. E oo lava i totonu o le atu Peretania, ua tuua'iina le faumalo a le Igilisi i le galoma o isi gagana laiti e iai le Cornish, toe o se 600 i latou o loo saunoaina. Le Gaelic a Sikotilani, toe 62,000 ni tagata o loo tauaveina, faapea foi le gagana a tagata Uelese.

I totonu o Farani o le Guernsey, faapea toe 1327 ni tagata e tautatala ai, ma ua togia o se tasi o leo aupito lamatia i lenei lava taimi.

O le tasi gagana o le Breton a tagata Brittany i le itu i matu o Farani. Fai mai molimau o se gagana sa olaola; ae na amata ona fai ifo ina ua folafola e le malo Farani le ave o le Farani ma gagana taualoa e faamuamua. I le

taimi nei toe 250,000 le aofa'i o e o loo fa'aaogaina, mai le 2 miliona sa iai i le amataga o le 20 seneturi. E ta'u mai, ua le toe faigata le sola a se gagana i lenei soloa'iga o tupulaga.

I lo tatou itulagi o Tokelau, Tuvalu; o le gagana Arha i Niu Kaletonia toe na o se 35 tagata e tautatala ai.

O le fesili e tula'i mai, Aisea ua faapea ai? Aisea le leiloloa atu o ni gagana ae leai se malosi e taofi atu ai? O le fesili tupito lea.

O le tali a le faasoa e maua i le Tusi Paia, i le fetalaiga a le Alii lava ia. (Mataio 6,33). I le sailiga i mea taua e ao ona faamuamua. Le Atua, alofa, amiotonu, tagata o mea sili na. Faatasi ma le gagana e soa ai.

I nei aso ua fua se gagana i sona aogā e faatau ai se oloa pe fatua'i ai se tamaoa'iga. I le fua faapisinisi tetele, a to'atele e saunoaina, o le lelei lena, e maua ai polofiti lelei, e manuia ai tamaoiga o nuu ma malo.

Ua ave ai le upu 'tupe' o le gagana masani ma se maaola e fagaina le naunauta'i. Ma suia nei le gagana e momoli ai se talanoaga a se nuu.

I tupulaga a Samoa e lei mamao atu sa ave le tapuaiga ia Tagaloaalagi o le maaola. O le malosiaga sa faatonuina a tatou tu ma aga, e aofia ai le tamaoiga. Sa fusia mea uma e le gagana tapua'i. Na faigofie ai ona soomaea le fua, mai ia Tagaloaalagi ia Ieova ma le lotu Kerisiano. Ae na o mai misionare ma faipisinisi Europa ma aumai se atua fou e lua a'i (Luka 16.13).

O le atua o le 'oa e tuufaafeagai ma le Atua o le tapuaiga sa tauosi e o tatou matua. O le atua fou ma lana gagana e le i le tapuaiga a o le tamaoiga. Pe foliga mai foi i le tapuaiga a o tua, o agaga o atua ese (Esoto 20.3).

Ia Tagaloaalagi sa malu gagana ona o le tulaga mua o le tapuaiga. I nei aso ua le faapena. Ua sui le pule, sui ai faavae, aga ma le talanoaga. I le pule a Tagaloaalagi sa tapu mamalu o nuu ona o le tapuaiga. I nei aso ua tufa pei ni taumafa; ua faamamalu e le tupe tusa pe le tautua pe le tau. O le mea ma lona tau. Ua talanoa le lalolagi i le gagana a le mau'oa. O le lamatiaga sili lea mo gagana laiti i nei aso.

A talanoa mai se vaega faaupufai i le una'i i luma o le tekonoosi ma le temokarasi, e atagia le gagana fou o talanoaga a lenei taimi. E iai le National a Niu Sila ma lana valaau e una'i le poto faatekonosi, ae i tua o lena o le to'esea o le lagolago i mataupu faalenuu (arts, humanities)

i iunivesite ma a'oga maualuluga. Ua aga'i ina le toe pele ni fatuga solo poo ni siva poo ni aga faataua a se nuu. Ua ave le faamuamua i mataupu e atia'e ai le tamaoiga ma faateleina polofiti mo pisinisi tetele a le lalolagi.

Ua le toe iai se naunau i malo e faaolaola measina o talatuu, fagogo, tala faasolo, auā e le fesoota'i ma le talanoaga fou o nei taimi.

O se ava lea o loo ua galulue i ai atua a le lalolagi faatasi ma se gagana fou e faatumuina.

Ua taumafai le UNESCO ma nisi e faamaumau i mata'itusi ia leo o nisi o nei gagana a mou atu. Faapei o ni toe mavaega mai tua'a. O moomooga ia toe feala mai i se aso o i luma, faapei o le Eperu. Ua mafai ona toe fafagu ona o tusi faamau a ana tusiupu sogasogā.

O le taua foi lea o le galuega faamau mo la tatou gagana. Auā e sau le aso ma lona atua ma le faamamafa. Pe tula'i mai nisi tupulaga latou te toe maua le uiga ma le aano moni o le tapuaiga (Ioane 4.24), ona aogā lea o sa tatou galuega.

E auai le faasoa i le taofi e afua pelega o se gagana mai le agaga o le Atua lava ia; i lona faamoemoe paia e faatofusia nuu ma se gagana. Ia le tasi se leo, se talanoaga, a ia fefatia'i ni pese e malie i lana faafofoga.


E tofua le fanua, le si'omaga ma sona leo, faapei o aga a le natura e le tasi se lanu, se foliga se faauigaga. E pei o le taufaifai a se fatusolo, O ai e fia nofo i se lalolagi e lanutasi! Ni manulele e leotasi! A o le agaga lena o atua o pisinisi tetele, ia tasi le leo ina ia faateleina le afaataua. Ia faigofie ona ta'ina tagata i a latou faatonuga.

O le gagana a le tapuaiga na ave ai le faamua i le Atua, malu ai gagana ma mea taua tauleloto. E faatulagatonu ai le tupe ma le tamaoiga i lona tulaga tonu; e le muamua ae pito i tua. Ua tatou vaaia le iuga faanoanoa, i le suiga o le tau ma malaia faanatura ua lofia ai.

Ae le o tagata uma, o iai i latou o loo naunau pea i le faaualoaina o gagana, le Tusi Paia ma Shakespeare; a tatou measina tauleloto ma le agaga; e ao ona ave pea ma se vaega o le talanoaga, o se filifiliga e lua ai.

E mafai ona faapea ua tatou iai tonu i le fetaula'igaala, ua aga'i ina mou atu tupulaga matutua sa taofiofi iumaea. O le fesili poo le fea talanoaga tatou te fia auai ma faaualoaina, poo lena a le tapuaiga e malu ai gagana, poo lena a le 'oa e iu i le faaumatiaga.

O agaga faumalo na fauina Papelu i le gagana e tasi. Lea foi ua liutino mai i nisi foliga fou i nei tupulaga.



## 19 - 25 AUKUSO

20

1811 Maliu le aliivaa Farani na faaigoa Samoa motu o tagata folau, i le taulaga o Pale

1830 Aga'i atu le Savali o le Filemu i Apolima; alala ai se alii Europa John Wright, na faaliliu upu mo Viliamu

1914 Pe le leitio a Siamani

21

1830 Feiloa'i Malietoa ma loane Viliamu i luga o le Savali o le Filemu

1873 Talia Tulafono Aia Tatau e fai ma faavae o le malo Taimua ma Faipule

1875 Faamamalu le faavae a Sitanipeka

1982 Saini le maliega va o Niu Sila ma Samoa e taofi ai le iuga a le Fono Mauuluga mataupu i le sitiseni Niu Sila

22

1898 Tuua le malo e Malietoa Laupepa, sui lona atalii o Tanumafili

1923 Tofia ni fautua Samoa mo le kovana

1924 Su'ega lona lua va o Fiti ma Samoa lakapi, malo Samoa, 9-3

23

1830 Feiloa'i atu Viliamu ma le aumalaga ia Malietoa

1887 Fa'aali le pule a Siamani i le taulaga o Apia

1894 Tatala a'oga fou Leulumoega

24

1982 Tatala fale loane Viliamu

25

1887 Folafola le tupu o Tupua Tamasese Titimaea ia Samoa

1920 Asia Samoa e perenise o Uelese (tupu Eteuati VIII)




# E

fetaui le soloa'i ane o Tanumafili i le nofo o le Malietoa ma le toe a'e mai o le faatafea a Mataafa Iosefo. A matau aga a le taimi ona iloa lea o le mauuluga o le lu'i mo se nofo talavou.

I ona tau'au le avega mamafa sa tauave mai e lona tua'a, na faapito ai le filifiliga a konesula e tolu ia te ia, afua mai i le 1880 ina ua tuumalo Talavou. Aulia mai le 1887 na liu ai le tai ina ua ave le lagolago a Siamani ia Titimaea; ma faatafea ai Laupepa. I lena ava na finau ai Mataafa ma Tupua Tamasese i le pule, ma tonu ai i malo pule e valaau mo ni vaatau e sauniuni mo se taua. E iai le tala lausilafia i le afa o o le 1889 na faauilavea ma taofia ai se vevesi tuga i le va o malo. Ae lei mafaia e le malosi o le Tulafono i Perelini 1889 ona foia le taua'imisa. I le 1893 na faatafea ai Mataafa i le pule a malo e tolu; 1894 siitaua Aana ma Atua i le malo o Malietoa, faailoa le tetee a Aana ina ua faatu le malo o Tamasese i Leulumoega. Toe taliu mai Mataafa ma avatu i ai le lagolago a Siamani. Na mafua ai le taua o le Aso Tasi, Ianuari 1899. I lea suiga o le tai o upufai, o Amerika ma Peretania i tua o Tanumafili a o Siamani mo Mataafa. Atonu o iai se faamatalaga i tua o le filifiliga a Siamani; pe sa faia mo sona lava lelei pe na mafua ona o le tulaga agavaa o Mataafa i le potomasani e fua i le talavou o lana paga tauva. Ae tasi le mea na mautinoa, sa tausili le malo lava ia mo sona 'ai i le finauga mo le pule aoao. O le iuga e lei umi le nofoaiga a Tanumafili, auā na maua le tonu o le a vaelua Samoa ia Sisifo ma Sasa'e. Aulia pulega a Siamani ua le toe ai ni tupu a o 'fautua.'

*Ata: Susuga a le faifeau toeaina Pouniu Faamausili ma le faletua ia Aniva, i le aso o le faanofotupu i le Malietoa, malae o Vaopipi i Malie, Tuamasaga.*

## Aukuso i le Tala Faasolo o Niu Sila



20 Aukuso 1904. Ulua'i fa'aaoga manu o le kiui o se faatusa iloa ai Niu Sila

21 Aukuso 1915. Taua o le Tula 60 kemupeni a Niu Sila i Kalipoli

23 Aukuso 1920. Avea Violet Waldron ma uluai sui tamaitai Olimipeka

24 Aukuso 1878. Tatala tautua a nofoafi setima taulaga Ueligitone

## NIUPAC PUBLICATION

Email: [evaleon.books@gmail.com](mailto:evaleon.books@gmail.com)

Phone: (03) 382-6674

Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

### Editor:

Levi Tavita, MPS, BTheol, BA, Grad Dip Tchg  
[ltavita8@gmail.com](mailto:ltavita8@gmail.com)

### Reporters:

Saili Aukuso, MA, BEd, DipTESL, DipTchg  
[saili.niupac@gmail.com](mailto:saili.niupac@gmail.com)

Vavao Fetui, MA, BEd, DipTESL, DipTchg  
[ola.niupac@gmail.com](mailto:ola.niupac@gmail.com)

Photographer: Fili Fuaava

## EVALEON BOOKS & NIUPAC PUBLISHING


Telefoni (03) 382-6674. Tuatusi meliE: [evaleon.books@gmail.com](mailto:evaleon.books@gmail.com)



Sponsors:

Evaleon Books & Niupac Publishing

*Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.*




**TAALOGA PASO SAMOA ~ GAGANA E LUA**

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or as directed.

**ACROSS**

- 1. position (6)
- 4. orange (4)
- 8. at the back (1,3)
- 9. Mark in Samoan (6)
- 11. When (6)
- 12. boil (4)
- 14. chess (2)
- 15. now (6)
- 19. swim leisurely (4)
- 22. yep (2)
- 24. grab a handful (5)
- 27. stinging (5)
- 28. startled (3)
- 29. last night (5)
- 30. life (5)




LPSTavita 2018 Copyright

- 24. lice eggs (3)
- 25. you two (3)
- 26. float (fish-net) (3)


**DOWN**

- 1. Name: Roger \_Sheck (7)
- 2. pandanus (7)
- 3. hesitate to speak out (2)
- 5. request (5)
- 6. Custom: seeking forgiveness (5)
- 7. cost (3)
- 10. loved one (4)
- 12. tide coming in (3)
- 13. car gear (3)
- 16. be bent (posture) (3)
- 17. village (3)
- 18. here (2)
- 20. wine (5)
- 21. noun of word 'uli' (5)
- 23. behaviour (4)

Tusi e fesoasoani:



Solution ~ Tali



*Laufatu Samoa: O se tala faasolo*

**O le peleti o Alifi**



**N**A gata la tatou tala i le tiligama'i a le susuga a le faifeau ma le failautusi, o le tina ma le pepe mafatia.

Ua faasolo ina masausau le alu a le pikiapu. Ua tau popole le faifeau ae faapea foi le tina ma'i, o loo ua pulapulavale atu i le avetaavale. Fai foi o le naunau e vave taunuu se'i mapu, a o le popole ne'i lavea le taavale pe afaina se tasi i luga o le auala. Ua musumusumu lemu le lotu a le faifeau, ma 'u'u mau le puipui o le keli, mea ane ua feto'ai a o loo maunofu. O le tamaloa foi o Si'u ua fai ma autilo i luma i lona to'alua ma le atalii. Na mate'ia e le avetaavale le popolega o le pasese. Ona fa'aaoga lea le tasi ana auala, a iloa atu nisi o savavali aga'i mai pe o atu, ona faa'e'e lea o le pu. E faapena i pi'oga ma vaega togavaoa o le auala.


Na a'e le taavale i le a'ega tu i Tiavi a o loo muamua atu i luma le pasi. Na taunuu faatasi i luga o le mafola ma avanoa loa le auala e pasi ai i luma. E fetau le pasi atu i autafa o le pasi ae faataupupula mai le pasese tumu a le pasi. Na fesaga'i lelei fofoga o le alii faifeau ma foliga o lona uso faifeau ma le faletua e galulue foi i le matagaluega e tasi. Ua si'i mai le aao o le uso faifeau ma 'ata mai, faapea le faletua ua talotalo mai, ma isi o le pasese latou te iloa lelei le faafeagaiga a Vaiola. E lagona atu le valaau a se teine, "O le faifeau, o Alifi." Ua taufai talotalo uma mai ae talo atu foi i ai le faifeau.

I lea lava taimi na po'ia ai i se lagona ese, o se lagona fou e lei tofo muamua i ai. E i le tua'oi o le masiasi ma le faate'ia. E le popole tele i le uso faifeau ma sona manatu, a o le nuu. O ia le ua tusilima i ai le afioaga e tauavea le mamalu o aiga; ae foliga ua na faatasina i ana aga faapei o se supokako. Talu ona avea ma a'oa'o, ma tofia foi i le tofi faifeau, e lei toe ti'eti'e i tua o se pikiapu. Ana o se pikiapu a lo latou aiga e feoloolo, a o lena a se tasi matai o le nuu. E tuua'ia nei le failautusi. Na taunapa i lana mataupu silisili, ae moni le upu, e ese le lauga ai ese le tofo i ai.

E foliga foi ua lagona e le avetaavale, le fetalaiga ia Maluelue, sea popolega o le faifeau. Ua tepa i le fa'ata ma misialofa i le faafeagaiga taulagi, o loo fesaga'i tonu ona fofoga ma le pasi o loo taulalata mai. Na te iloa lelei atu le avepasi o loo valo i tua i le pasese. E pei o le ao le mea o loo talanoa i ai. Ona omitu lea o lona vae se'i tala le va, e lei aunoa ae lilo atu le pasi i le vaai.

Na faato'a maua le to'a o le aupasese ina ua taunuu tonu i le nofoaga o le komesina a Niu Sila, ma faase'e malie ifo ai. Alu a'i maua atu Matootua ma afea loa le magaala e tau i le falema'i. Ua taufai lagona le vela ma le fia taumafa; ua tagi le pepe, e le pine ua fia 'ai. Ae faanana e lona tina ma fai i ai e onosa'i, se'i taunuu fafaga lea o ia. Ua autilo le avetaavale i lana uati mo le taimi. Ua ta tonu le 10. O loo lava le taimi, o le 12 na tuutala ai ma lona uso e fetau ai. Na afe le taavale i totonu o le paka taavale ma maua le avanoa e tu ai. Ona taufai faamalo lea le aupasese ma le avetaavale ma nati atu loa i le ofisa. O le faifeau na faiupu. O le teine ofisa na faatalofa mai ma logo atu loa i ai le uiga o le siigama'i. "Ia, lau susuga, na o le to'alua foma'i o loo avanoa ae feoloolo lava foi le lisi i leni taeao. Ae malie e onosa'i mai lava. Se'i ou talanoa i ai pe o le a se faiga . . ."

Ua punou le faifeau e peisea'i o loo ia tau faavasega foi sana faiga. O iai le falema'i tuma'oti. E mafai ona o i ai. E le tatau ona faatali umi. A o le lave foi e totogi tupe. Atonu e lava le \$60 o i lana taga. Ae i lea lava taimi na ma'alo ane ai se ata, o le foma'i o Ualesi, o lana uo sa la a'oga. Ua iloa mai o ia ma savali mai loa i le faatalofa. Ua faamatala atu i ai la latou siigama'i. Ua tilotilo le foma'i i le tina o loo fafaga lana tama. E le faigata ona iloa atu le mafatia. Ua tu o ia ma afisi lona fatafata i ona lima, o lona tama'i limatusitagata i lona auvae. O le tamatama'ilima e ola pe oti ai se ma'i pe a tusi i ai. Ua autilo i le lisi o ma'i, ona ea a'e lea ma valaau, "Poleka!" Ua savali mai se tama talavou ma lona lima e afisi mai i se fusi pa'epa'e. "E te malie oe le uso, e iai si tina lea ma lana tama e fia mana'omia vave se fesoasoani," o le foma'i lea. "E le afaina, e mafai a ona ou faatali a'u . . ." o le taule'ale'a lea. Ona ulufale atu lea o le fafine ma lana pepe i totonu. *E fa'aaauu*



1. Na sa'o le mate a le pagota, lea sa ta'ua i le vaiaso talu ai; ua sao ai; ae te'i foi ua toe molia ma faasala i le oti. Ua iloa ana filifiliga e tolu, o le pa e iai le afi, o le pa e iai fitafita ma fana, ma le pa e iai leona fe'ai. I lea taimi, ua tuu i ai ni leona sa fafaga ae le'i ma'o'ona. O le fea pa e tatau ona ia filifilia i leni taimi? Faamatala.


2. O le tamaloa e nofo i se tama'i motu e si'omia i le vai, e le mafai ai ona alu e faatau i le motu tele. E faasa ni vaa ni taavale ni vaalele i lea malo. Ae iai aso e vaaia ai o ia i le motu tele o loo fai lana faatau. Faapefea ona tupu lea mea?

**Tali Palo OLA 23:**

- 1. E tatau ona filifili e le pagota le pa o leona. Ua leva ona pepē leona ua tele tausaga e lei aai.
- 2. O le tamaloa fulufaamalama sa i totonu o le foga fale 30, e le o fafo. E moni na sulu pa'ū a o luga lava o le fola 30.



# PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Paul Tillich  
Aso Fanau: 20 Aukuso 1886  
Ausiga: I lona tulaga o se faimataupu silisili ma se faia'oga mataupu lotu  
Fetu: Leo

E le matāea i sina palakalafa le mataupu a Paul Tillich le faia'oga. Ae pule le e totoma i le mea e taua mo ia. Mo e ua silafia, o se faia'oga ma se faitofa i le filosofia faaletagata, atoa foi le mataupu silisili faaleAtua. O ia na finau i le iai o le faia'oga a nei matafaioi e lua. Ia te ia o fesili tupito o le olaga e lagaina e le filosofia ae mafai ona sailia o latou tali i totonu o le fe'au a le mataupu silisili. O na fesili e taula'i i le olaga faaletagata i ona mafatiaga ma masaloga tupito i totonu ma fafo. E mafua ai sona taofi e le vavae esea se aganuu mai se tapuaiga, e iai le faia'oga a fesili ma faafitauli tauaganuu e mafai e le mataupu Kerisiano ona tali, e ala i ona taofi poo faatusa molia i le Tusi Paia. E talitonu le alii faia'oga e le mafai e se aganuu ona talia to'atasi na fesili, pe faalagolago i le na o tali e faitauina mai i tusiga pa'ia; ae tatau ona afua mai le sailiga o le tali i le olaga ma le tulaga o tagata; e nanea ai se tali atu e ala i faatusa Kerisiano ma upu o se gagana. Ta'ua e Tillich i sana tusi lona tulaga o se tasi e tu i le tua'oi o ni filifiliga se lua. Pe faapea foi o le tua'oi o filifiliga e feagai ma se tagata saili i le puna ma le faavae o le ola. Le lototele e fai ai le filifiliga. E fesoota'i i lana taofi i le tulu'iga o le atu, le popole i mea aupito taua ma le aoga, e pei o Maria e faatusatusa ia Mareta i le molimau a Luka. Mo Tillich o le tulu'iga o le atu faaletagata o le Atua, e afua ai lana saili atu i le Paia.

### ATI A'E UPU:

**filosofia** (n) a'oga i le natura taotooto o le potu, le lalolagi le olaga ma lona uiga. Se isi upu: tofamanino. Igilisi philosophy  
**mataupu silisili** (n) a'oga i le uiga o le Atua ma talitonuga lotu; o se suesuega loloto i le pa'ia ma lona natura. Igilisi theology  
**tulu'iga o le atu** (fn) tumutumuga o se mea e mafaufau loloto i ai, pe atu popole i ai, pe faataua foi. (Tillich). Igilisi ultimate concern.

### Tulimanu o Pola:

## Totogi o faia'oga, pepa iila ma faafotutupu



E fiafia e faafeiloa'i atu i le mamalu o le aufaitau i lenei foi vaiaso. Malo le malaga. Viia pea le agalelei o lo tatou Tautai Sili.

Muamua lava le faamalo i le fitaituga o susuga i faia'oga, ua avea i latou ma 'auga o aute i lipoti a TV o lona vaiaso. Tutupu ai foi ni fesili taligata. E faigata ona faavasega le va lea o le pule ma le tautua. Ua tatou masani i le soifuaga faaSamoa na fofoa mai ai. E leai se mea faapea a leaga le pule ona solotetee lea o le tautua. Pe le alofa le matai ona tauimasui lea o le auaiga. E alu lava i le faalolo. Sa ou talatalanoa foi i nai a'u pa'aga, Pole ma Papa. O le la'ua fofu, fai se fua e faatusapau uma ai totogi. Fua i le faailoga ae le fuaina i le tofi poo le galuega. Tusa poo o le faipule, poo le faatonu, a umia le tikeri, e tutusa lava lou totogi ma le faia'oga e fai foi se tikeri. O se faiga lelei lona e faasafua tutusa ai le faasoa a le tamaoaiga. Ou te fiafia i le fuafuaga ae ailoga e apoina e se faipule.

O le tasi auala e tilotio i ai le malo mo faia'oga o le 'aia le totogia ni a latou lafoga. Pe totogi foi a ia tuu ifo lava i lalo. Sa fai la'u faavasegaga o totogi o le faiva i Samoa ma Niu Sila nei. I la'u tilotilo e toe lava ina paga tutusa pe a fua i le tele o mea e totogi. I Niu Sila nei e fiu e togi pili, a o Samoa a iai si ou faleoo le paipa ma le paoa, e mafai lava ona 'a'u le faasoa. Ia, masalo, na o se taumate, pau le mea ua iloa e le mataofia le si'i pea i luga o le tau o oloa a le aufaioloa. Manatu i ai, o polofiti pito lapopo'a i le faaiuga o le 2017, o na o pisinisi faleoloa tetele; le tioa a taugata oloa.

Ua pasia nei le tulafono a le malo e vaoia ai i latou mai fafo i le faatauina o ni fale i Aotearoa. E manatu o se auala lea e fesoasoani ai i aiga o loo naunau e faatau ni fale. Ae ta'ilo, 'ai vagana ua \$160 afe lou totogi, ae pe mafai e le malo ona fai se faatatau i lona tiposi ua ova.

Atonu e sa'o le tetele a nai kamupani o loo gaosia le pepa iila. E le o le pepa e mafua ai, o le tagata. Pe faaoga foi 'ato pepa, e uma ane lava ua tafefea i le sami. Pe lua pini lapisi e faavasega ai le atigiapa ma isi lapisi, a oso le paie ua togi faatasi uma i le pini samasama. E le o le pepa, o le tagata.

Matagofie le tilotilo atu i ata o le faanofotupu o Faamausili Moli i le suafa Malietoa. E le pei le sasalu o le sauniga lenei i lona na muamua. Tete'i mai tuaoi i le papa atu o laau malolosi i le taeao sesegi. Na matua'ia ai ni faamasinoga. A o le tatalo a le toeaina ia Pouniu ma le tapuaiga a Malie, ia muta ai vevesi. Ae molimau mai le afoaga Maualaivao Pepe e lei auai Afega ma isi. Ia, o le a le oo i ai se faamatalaga. Ae talosia ia le soloa'i ane. Ua loa le tapuaia e Samoa o se laofie faapea, se sui o le Malietoa aga tausaaafia ua mavae atu. Soifua le tupu. Manuia le aufaitau.

## POLE MA PAPA

